
DISSERTATIO PROÆMIALIS.

DE NATURA, OBJECTO, FINE ET UTILITATE

THEOLOGIÆ MYSTICÆ.

§ 1.

THEOLOGIA MYSTICA QUID?

Theologia Mystica est scientia, ex divinitùs revelatis procedens, quæ doctrinas ad perfectionem virtutum consequendam conducentes tradit.

THEOLOGIE VARIE SPECIES.

SCHOLIUM I. Theologia, in genere, est sermo vel scientia de Deo. Si de Deo agat per solum lumen rationis, dicitur *Theologia Naturalis*: si per lumen divinæ revelationis dicitur *Theologia Revelata*; si tractet de sola explicacione principiorum, prout revelata sunt, dicitur *Theologia Dogmatica*; si agat de iisdem principiis contra *adversarios fidei* defendendis, dicitur *Theologia Polemica*, vel *Controversistica*; si agat de moribus juxta legem Dei æternam præcipientem aut prohibentem componendis, dicitur *Theologia Moralis*; si agat per discursum concludentem, deducendo ex mysteriis revelatis alias veritates mediatas, dicitur *Theologia Scholastica*; si sacra symbola, sive notas rerum, figuratè divina repræsentantium explicit, mysteria sub illo figurarum cortice contenta enucleando, dicitur *Theologia Symbolica*: si procedat non præcisè speculando, sed dirigendo et movendo, conformiter ad principia practica revelata, per omne genus moralis perfectionis, ad magis ac magis

cognoscendum et amandum Deum, dicitur *Theologia Mystica*; quæ differt a scholasticâ in eo quia materia ejus est tota practica: a morali verò, quia practica est in ordine ad perfectionem, et non sicut in peccatis solummodo vitandis, sed ulterius procedit ad mores per consilia perficiendos usque ad unionem voluntatis creatæ cum divinâ per summos apices. *Divisio Theologiae in Mysticam et Symbolicam* sæculo quinto primum audiri cœpit, postquam libri sub nomine S. Dionysii Areopagite, de quorum auctore critici disputant, comparuerunt. Liber de *Theologia mystica* sub nomine S. Dyonisii adhuc extat; illum S. Maximus M., Pachymæras et alii suis commentariis illustrarunt, atque a S. Thomâ et aliis Theologis maximi habetur. Reliquæ divisiones a seculo xii, post Petrum Lombardum, Episcopum parisiensem, dictum Magistrum sententiarum, qui strictiori methodo materias theologicas in scholis pertractare cœpit, successivè invaluerunt.

THEOLOGIA MYSTICA EST SCIENTIA.

SCHOL. II. *Theologia Mystica* rectè dicitur *scientia*, tum quia non minus evidenti discursu procedit quam reliquæ humanæ scientiæ: tum quia in materiâ suâ non minus, imò magis certò procedit, ut pote nexa principiis fide divinâ creditis, etsi non evidentibus lumine naturæ.

EST SAPIENTIA.

SCHOL. III. *Theologia Mystica* vera est *sapientia*, quia per altissimas causas judicat de perfectione inferiorum et media fini optimè convenientia subordinat.

EST PRACTICA.

SCHOL. IV. Denique est *practica*, tum quia tota quanta eō tendit ut sive incipientes, sive proficientes, sive perfectos magis ac magis usque ad intimam unionem cum Deo in viâ et in patriâ perficiat: tum quia illius revelata principia sunt practica, scilicet: *Diliges Dominum Deum tuum*, etc.; tum quia media illius, oratio, mortificatio, etc., ad operationem tendunt.

DIVISIO THEOLOGIÆ MYSTICÆ.

SCHOL. V. *Theologia Mystica* dividitur in *doctrinalem* seu *subjectivam*, quæ in hoc opere explicatur et § 1 definita fuit: et in

experimentalem aut *objectivam*, quam aliqui sic definiunt: extensionem animi in Deum per amoris desiderium; *alii*: motionem anagogicam, id est, sursum ductivam in Deum per amorem purum et fervidum; *alii*: experimentalem cognitionem habitam de Deo per amoris unitivi complexum. Gerson, *Tract. 7, sup. Magnif.*, l. 3, ita definit: «Est divinissima Dei cognitio, quæ est per ignorantiam cognita, secundum unionem super mentem, quando mens, ab omnibus aliis recedens, postea etiam seipsam dimittens, unita est splendentibus radiis, inscrutabili et profundo sapientiae lumine illuminata.» Hæc non ab hominibus et verbis, ut aliæ Theologiæ, sed per experientiam et internis sensationibus addiscitur, et a Deo solo edocetur, ut patet ex S. Dionysio, qui suam *Theologiam Mysticam*, c. 1, ita exorditur: «Dirige nos (SS. Trinitas) ad mysticorum oraculorum plusquam indemonstrabile et plusquam lucens et summum fastigium, ubi simplicia et absoluta et immutabilia Theologiæ mysteria aperiuntur in caligine plusquam lucente silentii arcana docentis. Tu verò, Timothee, in mysticis contemplationibus intentâ exercitatione, et sensus relinque et intellectuales operationes..., siquidem per liberam et absolutam et puram tuū ipsius a rebus omnibus avocationem ad supernaturem illum caliginis divinæ radium, detractis omnibus et a cunctis expeditus eveheris.»

THEOLOGIÆ MYSTICÆ OFFICIUM.

SCHOL. VI. Ex dictis sequitur *Theologiae Mysticæ doctrinalis* seu *subjectivæ officium* esse: 1º *Theologiae Mysticæ experimentales actus* perfectè aut imperfectè unitivos considerandi ac secundum S. Scripturæ auctoritatem, SS. Patrum et Mysticorum dicta, hujusmodi actuum proprietates et effectus examinandi; 2º regulas certas contemplativis tradendi, ut securè et utiliter procedere possint in suis ad Deum ascensionibus et alias assignandi regulas illis qui, nondum in statu contemplationis constituti, seipso disponunt ad tam excellentis doni acquisitionem.

§ 2.

OBJECTUM ET FINIS MYSTICÆ THEOLOGIÆ.

Objectum et finis Theologiæ Mysticæ est, animam per viam perfectionis ducere usque ad unionem perfectæ caritatis cum Deo.

QUOD ETIAM SE AD VIAM PURGATIVAM ET ILLUMINATIVAM EXTENDIT.

SCHOLIUM. Theologia Mystica, si penes objectum suum adaequatè sumatur, non est restringenda præcisè ad gradum perfectæ unionis *contemplativæ*, sed se etiam ad incipientes et proficientes æquè ac ad perfectos, seu ad viam *purgativam*, *illuminativam* et *unitivam*, de quibus in decursu sermo erit, extendit: sic S. Dionysius, c. 1 suæ Theologie Mysticæ, multus est ut per praxin illius perducat animas valde purgatas et illuminatas ad perfectæ caritatis unionem, et demum exemplo Moysis *Exod.*, xix, concludit: «Non enim temerè divinus Moyses expiari primum ipse jubet (en viam purgativam), ac deinde a non expiatis segregari; et post omnem expiationem audit multisonas tubas cernitque multa lumina, puros ac multiplices radios jacentia (en viam illuminativam), postmodum a multitudine separatur, et cum electis Sacerdotibus ad summum fastigium divinorum ascensuum pertingit (en viam unitivam).» Eodem modo Gerson *Tract. de myst. Th. pract. consid.*, Mysticæ alumnos enumerans, ait: *Numeramus primos inter incipientes, alios inter proficientes; perfecti sunt reliqui.* Quod idem in reliquis Theologis mysticis observare licet. Nec dicas quòd hoc modo Theologia Mysticæ a morali non differret, utpote quæ in moribus absque peccato componendis consistit. Nam hoc solum sequitur quòd *Mystica Moralem supponat et perficiat*: *Mystica enim non solum agit de jam perfectis; sed de tendentibus et aspirantibus ad perfectionem*: siquidem opus Theologiae Mysticæ est reddere perfectos: quod nonnisi per partes fit, et incipiendo, et proficiendo, et perveniendo: in quibus omnibus *Mystica lumen et vires ministrat*.

§ 5.

PRINCPIA ET LOCI THEOLOGIÆ MYSTICÆ.

Principia e quibus Theologia Mysticæ suas regulas et veritates accipit, eadem sunt e quibus Theologia Dogmatica, Polemica, Moralis, et Scholastica suas veritates, regulas et conclusiones deducit; scilicet: S. Scriptura, Traditio, ad quam revocantur unanimis Patrum consensus in uno dogmate; et Ecclesia, sive in Conciliis œcumenicis cum Capite

suo congregata, sive dispersa, in dogmate a Capite suo definito consentiens; et *Decreta summorum Pontificum*.

ALII LOCI.

SCHOLIUM. S. Scriptura, Traditio, Ecclesia, Decreta summorum Pontificum dicuntur *Loci Theologici interni necessarii*: *loci* verò *interni non necessarii*, qui subministrant principia e quibus elicuntur propositiones magis vel minus probabiles, sunt *Auctoritas Conciliorum Provincialium et Nationalium*, atque *SS. Patrum*, quando separatim spectantur, ac *Theologorum tum Dogmaticorum, Polemicorum, Moralium, tum Mysticorum.* *Locus externus* pro dilucidandis veritatibus Theologiae Mysticæ, est vel *Ratio*, vel *Auctoritas Philosophorum et Historicorum*, vel *Experientia* in rebus mysticis.

§ 4.

EXPERIENTIA AD MYSTICAM REQUIRITUR.

Ad Theologiae Mysticæ perfectionem acquirendam *Experientia* et *Praxis* maximè conducit et necessaria est. *Primò* enim Theologia Mysticæ tendit ad praxin. Cujusvis autem artis vel scientiae practicæ proprium est, quòd ipsa praxi, etiam in docendo, perficiatur, qualenus propriâ experientiâ regulas suas congruè applicare et errores evitare discat: quippe fabricando faber fit. *Secundò* operationes interiores et affectus cordis nunquam tam bene, vel proprio discursu, vel ex alterius testimonio cognoscuntur, quām proprio experimento. Cum ergo Theologia Mysticæ in iis perficiendis potissimum occupetur, patet, ad eam vel addiscendam vel docendam, experientiam propriam esse necessariam: ut enim Cassianus *Collat.* 12, c. 13, ait: «Tanquam si quis dulcedinem mellis ei qui nunquam quidquam dulce gustaverit, velit sermonibus enarrare, profectò nec ille saporis suavitatem quam ore percepit, auribus capiet, nec ille dulcedinem quam gustùs voluptate cognovit, verbis poterit indicare.» *Tertiò.* Perfectissimi *Mystici semper etiam fuerunt sanctissimi propriâ ex-*

perientiā a Deo edocti, uti in S. Joanne a Cruce et S. Theresiā, etc., appareat. Unde meritò Gerson, *Tr. de Myst. Theol.*, Cons. 31, non vult ad Mysticam admittendos, maximè in Directores, « qui, tumentes jam philosophiā malèque videntes, conculant pedibus suis sordidis quidquid non sapiunt, quidquid etiam non intelligunt canino dente lacerant, » juxta illud Pauli *Rom. viii, 5*: *Qui enim secundūm carnem sunt, quae carnis sunt, sapiunt; qui verò secundūm spiritum sunt, quae sunt spiritus, sentiunt.*

NON TAMEN EJUS NOTITIA SOLIS PERFECTIS RESERVATA EST.

SCHOL. I. Dum dicitur ad Theologiam Mysticam perfectè docendam vel addiscendam propriam praxin et experientiam requiri, non est sensus, quasi verò docens vel discipulus semper jam perfectus et contemplationis extraordinariæ munere a Deo donatus esse debeat; sed sufficit quòd cum fervore in viâ Domini incipiat vel proficiat, quo modo longè excellentiùs Mysticæ veritates vitæ spirituali proprias, vel explicare vel capere poterit.

MYSTICA NON SOLI PRAXI RELINQUENDA EST.

SCHOL. II. Mysticæ non soli praxi et experientiæ relinquenda est; sed in quantum Mysticæ doctrinali conformis fuerit, cuius subdio, juxta regulas fidei et Doctorum experimentalium, qui ut securi testes in Ecclesiâ habentur, errores evitari queant. Ut enim Gerson citatus monet, non sunt illicò contempnendi vel rejiciendi, qui viâ spiritus extraordinariâ ducuntur; nec tamen ipsis ex levi credendum est; sed ad normam traditionis Ecclesiae accuratè examinandi sunt, ut pretiosum a vili separetur. « Compertum est « multos habere devotionem, sed non secundūm scientiam: quales « procul dubio pronissimi sunt ad errores, etiam super indevotos, « si non reputaverint effectus suos ad normam legis Christi: si « præterea capiti proprio, propriæ scilicet prudentiæ inhæserint, « spreto aliorum consilio. Hoc in Begnardis et Turelupinis mani- « festum fecit experientia. Dùm itaque sequebantur affectus suos « sine regulâ et ordine, postpositâ lege Christi, præsumptio nequis- « sima precipitavit. »

§ 5.

THEOLOGIA MYSTICA DOCTRINALIS EST NECESSARIA.

Ex præmissis fluit *Primò*, quòd, præter Theologiam Mysticam experimentalē, *Theologia Mystica doctrinalis*, velut scientia acquisita et more scientifico procedens, *necessariò admittenda sit*. *Primò* enim licet Mysticæ doctrinalis multa a Deo in S. Scripturâ revelata, plurima a Patribus tradita, multa privatim revelata vel per alia lumina infusa et sine alio magisterio contemplativis communicata supponat; tamen ex his principiis regulas securas colligit, quæ animas ad perfectionis christianæ fastigium perducant; quæ regulæ, cùm sint necessariæ, etiam Theologia Mysticæ doctrinalis erit necessaria. *Secundò*. Sine Theologiâ Mysticâ doctrinali sola experimentalis facile ad spiritum declinat privatum et illusum, qui est fomes omnium hæreticorum in Speculativâ et illusorum in Mysticâ. Unde etiam ipsa Ecclesia, sive in judiciis S. Officii Inquisitionis, sive in causis canonizandorum, spiritus maximè extraordinarios, accuratissimè, juxta regulas Mysticæ doctrinalis, examinat. Et S. Theresia c. 13 *sue Vitæ* animabus spiritualibus summopere commendat, ne sibi ipsis fidant; sed Confessarium litteratum, licet non ita Mysticæ experimentalis expertum, perfectionis tamen studiosum querant, et ait: « Magnæ res sunt litteræ, utpote quæ instruunt et docent nos parvum sapientes: invenientes verò illarum luce veritatem Scripturæ, facimus mox quod tenemur. » Et P. Segneri in suâ *Concord.* pro deteriori signo Quietistarum habuit, quòd solos expertos judices suæ doctrinæ statuerent, et ait: « Experientia quidem juvat plurimū; at est fallax, maximè in his materiis, quæ cùm non sint physicæ, sed morales, subjectæ sunt quàm maximæ varietati. » Ergo Theologia Mysticæ doctrinalis ad evitandos errores in viâ perfectionis, ac ad directionem animarum et spirituum discretionem, est necessaria.

HUJUS NECESSITATIS MOTIVUM.

SCHOLIUM. Quodnam autem hujus doctrinalis Mysticæ necessitatis motivum facilè videri est. Verum enim est non paucas in Ecclesiâ inveniri animas quas *solum* Deus interius dicit et illuminat locutionibus, visionibus, luminibus, altioris ac sublimioris spiritûs ascensionibus : attamen nulla est inter eas quea periculo non subjaceat, sive propriæ imaginationis illusionibus, sive dæmoniorum fraudibus, in gravissimos errores frequenter cadendi.

§ 6.

THEOLOGIA MYSTICA EST SCIENTIA UTILISSIMA.

Ex præmissis sequitur *Secundò*, *Theologiam Mysticam esse scientiam utilissimam*. *Primò* enim, ut Alvarez de Paz in *Præf. de Vit. Spir.* ait : « Hæc est vera sapientia, quæ non in jejunâ speculatione, sed in utili operatione sita est; non in disputationibus, sed in fugâ ab omni malo, in adhaesione incommutabili bono et in perfectâ mandatorum observatione, atque in animi puritate consistit. » *Secundò* Theologia Mystica abundat principiis fidei revelatis in universalibus et singulibus; gaudet signis specialissimis credibilitatis, pro discretione inspirationum, revelationum et spirituum: discursibus utitur tam solidis quâm utilibus et inter alia, ut in oratione mentali utilissimè discurrere doceat. Dona supernaturalia, non solum fidei et scientiæ, sed etiam prophetiæ et discretionis spirituum, raptuum, extasiū internoscere et vera a falsis discernere docet, uti ex decursu patebit. Ergo est utilissima.

§ 7.

EST PRÆSTANTISSIMA.

Tertiò sequitur, *Theologiam Mysticam esse scientiam præstantissimam*. Unde eam maximis elogiis Ascetæ deprædicant.

Gerson, *de Mont. contempl.*, c. 4, ait : « Credo quòd ista sit sapientia quam principaliter B. Dionysius in libris suis de *Mysticâ Theologiâ* docuit : et est sapientia excellentior et altior quam possumus habere in mundo, quæ fuit ei revelata per B. Paulum Apostolum, cuius ipse exsifterat discipulus. » Ludovicus a Ponte in suâ *Introduct. ad ducem spirit.* de *Mysticâ* ait : « Est sine dubio quæ incomparabiliter excedit omnes alias scientias et artes Universi : quia est omnibus altior, nobilior, sanctior, utilior, delectabilior et diuturnior, et finis ultimus in quo residet vita præsentis beatitudo, ad quam reliquæ scientiæ ordinantur. » Alvarez de Paz in *Præf. de Vit. Spir.* inquit : « Quòd si æquum reputatur, sicut revera est, ancillas comere et emollire, id est, scientias, quæ intelligentiam illustrant, exponere; quantò æquius erit, pulcherrimam dominam, hoc est, scientiam voluntatis, quæ sanctitatis dicitur, perpolire et regalibus indumentis circumdare; siquidem sola sine aliis Deo gratissima est et reliquæ sine istâ neque in cœlestem thalamum admittuntur, nec pulchræ et decoræ existimantur. Hæc est vera justorum sapientia. »

THEOLOGUS MYSTICUS AD PRAXIN PROPRIAM PROCEDERE DEBET.

COROLLARIUM. Præcipua ergo prærogativa Theologiae Mysticæ est, quòd ex fine suo intrinseco referatur ad amandum Deum et ad exercitium tendat perfectionis christianæ : quod nisi fiat sive in Doctore, sive scholari, erit scientia vix suo nomine digna, sed mutila et monstrosa. Ut enim S. Bernardus *serm. in Nat. S. Joan.* ait : *Et tantum lucere vanum, et tantum ardere parvum; lucere et ardere, perfectum.* Et certè tunc solum sapientia meretur dici talis, quando candidatum suum in cognitionem suâ ipsius et Dei quem contempletur et amet, dedit : inde docere poterit et ardere, omnèque lumen lucis in ignem ardoris referet, quo seipsum et alios illuminet et inflammet: cùmque nihil se habere cognoscat, hoc ipsum humili et assiduâ oratione deposet, exactâ virtutum praxi sese exercebit et doctrinales scientias referendo in Deum divinas efficiet. Quid enim prodest, ait libellus *de Imit. Christi, alta de Trinitate disputare, si careas humilitate, unde dispiceas Trinitati?... opto magis sentire compunctionem, quâm scire ejus definitionem.* Quanta, quæso, deformitas respectu Mysticæ, quæ ad per-

fectionem dicit et exhortatur, si in sciendo sistat, nec ad opus progrederiatur? Similis est, uti Gérson in suâ *Theol. Myst.*, consid. 31, observat, filio, qui patris sui arcana voluntatis solum scire cupit, nec tamen jussa ejus implet; qui ideo pœnam ejus et iram non effugiet. Imitemur Angelicum Doctorem S. Thomam, de quo in ejus *Vita* Guilliel. Thosclus ita scribit: « Videbatur in ejus anima intellectus et affectus: sicut invicem se comprehendunt potentiae liberæ, sic invicem sibi subserviebant in suis actionibus ut supremæ: ut affectus, orando, mereretur ad divina ingredi, et intellectus, hujus merito, infueri quæ altius intelligeret, quò affectus ardentius in id quod luce caperet, amore flagraret. »

§ 8.

SYSTEMA THEOLOGIÆ MYSTICÆ.

Superest, ut modò *Systema Theologiae Mysticæ* nostræ exhibeamus, quod ita formamus. Finis Theologiae Mysticæ est, animam per viam perfectionis ducere usque ad unionem perfectæ caritatis cum Deo: adeoque *primò* explicandum est, in quonam vita spiritualis et perfectio consistat et quanta sit hominis ad eam tendendi obligatio. Cùm verò Theologiae Mysticæ opus sit reddere hominem perfectum, quod nonnisi successivè et per partes fit scilicet incipiendo, proficiendo et perveniendo, *secundò* tractandum est, quomodo incipientes per viam purgativam ad perfectionem tendere debeant scilicet per fugam peccati mortalis, venialis et teporis, ad quod oratio et mortificatio est necessaria. *Tertiò*. Quia anima a peccatis et vitiis purgata, proficiendo in vitâ spirituali, in viâ illuminativâ crebrius a Deo illuminatur et Christum sequitur, qui est lux vera, via, veritas et vita; et quia in hac viâ comparandæ sunt virtutes, quibus anima Christi sponsa illustratur et ad Deum summum bonum firmiter amandum disponitur: hinc de imitatione Christi et acquirendis ex eis virtutibus et occurrentibus in hac viâ tentationibus et difficultatibus sermo erit. *Quartò*. Homo ita illuminatus tandem ad apicem perfectionis, quatenus in hac vitâ obtineri potest, in

viâ unitivâ, uniendo se cum Deo, pervenit et ad contemplationem ascendit, ad quam Deus illum per varias vias deducit et demum variis modis se cum anima perfecta unit: qui proinde modi explicandi sunt. Hæc erit materia tomî primi hujus operis.

Ne verò perfectionis studiosus a rectâ semitâ in viâ illius aberret, Directore spirituali opus est, cuius munus tomus secundus explicabit, ostendendo *primò*: An, et qualis spiritualis Magister procurandus sit ab animabus ad perfectionem aspirantibus; *secundò*: quomodo Director temperamenti aliorum se accommodare et incipientes, proficientes et perfectos juvare eorumque vitia corrigeret debet; *tertiò*, quomodo spiritus bonos a malis et illis, per discretionem spirituum, discernere et spiritus vitiatos emendare possit; *quartò*, quomodo revelationes, prophetias, apparitiones, visiones, raptus, extases, quibus nonnunquam animæ perfectæ a Deo donantur, ritè internoscere et dijudicare valeat; *quintò* denique, quomodo Superior Religiosus subditos suos Religiosos sanctè et bene regere possit et quænam potissimum virtutes in bono Prælato ad hoc requirantur. En systema totius Theologiae Mysticæ, quod in hoc opere, adjuvante Deo, explicabitur.

